

別記第一

回回事略

回回祖國曰墨克默迪納舊音墨克默克那在葱嶺極西境相傳排合木巴爾舊音派葛木巴爾自祖國東遷至今山南庫車以西諸城皆其種也唐宋以來未著宋史於龜茲曰回鶻別種元太祖定西域始征回回滅里而喀什噶爾羗之名由此始然其後統於巴什伯里絕無紀聞康熙三十五年喀什噶爾回首阿布都里什特率妻子來朝賜冠服遣使護送哈密俾歸國後阻于準噶爾不獲內附回人尊造化之主專以拜天爲禮每日對始生教主誦回經五次七日則羣赴禮拜寺誦經有通經典者稱曰阿渾猶番俗之喇嘛也男子削髮以布纏之女子編髮蓋頭不露其面相見時屈一足如著地狀以雙手撫尊長膝問安好尊長以一手撫其背而慰勞之尋常鞠躬而已謂拜跪則唯敬天以葡萄釀酒味極美不知斗斛止設權衡同姓者皆爲婚居喪擗踊號泣無常時亦無服制但去紅綠諸色

夫死則其妻散髮去簪環死之日以水浴尸入尸口曰滌胃腸始可見教主以白布裹尸而葬臨穴抽棺底墜尸土中因瘞之常於墓間設祭無干支朔望以教主初生之年爲元年每三百六十日爲一大年周而復始大年第一日如中國之元日交相叩賀里巷喧闐先期三十日必把齋日出閉齋星見開齋周月始茹葷大年前十五日謂教主是日下降鑒察善惡先一夜舉家晝夜誦經不寢大年後七十日爲小年祭天行禮如大年例是二年者爲排哈木巴爾所留遺傳其教而不變者也回俗尙耕耘勤紡織不事鬼神飲酒宴會有加禮饋遺以九爲數惟以豕性昏形穢忌不食人多善商賈故西域賈胡以及傍近諸國無不至各城市集曰八柵爾每當期會貨若雲屯奇珍異寶往往有之準噶爾強山南城郭皆其所役屬有和卓木墨特者時爲衆所推服準噶爾因執而囚之地牢數年釋之仍于伊犁禁錮和卓木墨特在伊犁生二子大兵討滅準噶爾和卓木墨持已死伊犁將軍始將其子波羅泥都霍集占二人釋歸故土並

令霍集占偕霍集斯鄂對等招撫回城逆酋霍集占狡猾不軌既歸盡逐舊時之伯克以其腹心佈置各城乾隆二十三年春將軍遣伊敏圖至庫車察其動靜逆黨布都克勒木遂誘殺伊敏圖以叛喀什噶爾葉爾羌逆酋兄弟巢穴也六月大兵圍庫車霍集占來援敗之于托和鼎殺戮五六千人賊逃入庫車城大兵攻圍一月不得出將軍雅哈爾善疎于事機致賊得乘黑夜遁還而阿克蘇烏什之舊伯克咸協力與賊拒戰逐其逆黨獻城降帝怒命兆惠往代其軍十月兆惠率師抵葉爾羌賊閉城固守城中時出賊兵抵戰屢殲敗之軍中得偵者言賊在城南英額齊盤遂移師濟哈喇烏蘇未濟橋斷遂引還渡河達城東大營賊等乘機四集合圍將軍接戰五晝夜賊乃退時大兵自庫車遠至兵疲馬乏於是掘壕築壘以待援師兆惠之懸師深入也參將舒赫德副將軍富德統兵赴援至廿四年正月六日次巴爾楚克兵會翌日次呼拉瑪賊擁兵迎拒大兵整隊前進轉戰沙磧中竟日夜不息兵士咸拾冰塊以咽是時馬兵纔

六百士多步行者賊故輕之比至葉爾羌渡口適阿里袞解馬千匹星馳來會遂分兵兩翼謹呼馳突賊衆驚潰乘勝直抵葉爾羌與兆惠夾攻破賊將軍復還至阿克蘇整軍進五月京兵齊集將行逆酋聞之遂從葉爾羌西遁波羅泥都亦自喀什噶爾驅其民人踰山而西與霍集占俱遁參贊明瑞以前鋒九百追擊賊衆于和碩庫珠克賊又西竄八月賊據阿喇楚勒兩山頂時富德將中軍明瑞領前隊阿桂阿里袞巴祿分領中後隊又設奇兵授兵爲左右翼四面應援如墻而進擒斬伯克數十人前後剿殺四千餘衆于是乘勝追至葉什勒庫勒賊憑高據險我師仰攻歷時未克將軍令樹回纛使新降回人傳諭招降俄而回衆數千人挈子女駝載牲畜號呼願降沸聲如雷漫山蔽野奔投而下霍集占禁之不能止而助逆渠魁如阿布都克勒木等並臨陣殲之霍集占遂乘夜以殘衆四五百人與波羅泥都奔拔達克山拔達克山汗素爾坦沙遂以兵圍霍集占于阿爾渾楚哈嶺擒之囚于柴札木初素爾坦沙以二酋與己同

派欲縛獻恐諸部不從難之富德以順逆利害之故委曲諭之遂感悟乃殺逆酋二人來獻西域遂定時乾隆己卯八月也其人云回疆紀年自排合木巴爾始乾隆己卯已一千一百九十三年矣回疆有六大城自是均隸職方特設總理回疆參贊大臣一員各城簡派滿洲都統辦事大臣一員凡兵防賦役錢法屯田牧場諸務一時建設回部舊有伯克等官我國家仍其舊名寵以天朝之品職自三品至七品不等其時從戎効力者如鄂對則授葉爾羌色提巴爾第授喀什噶爾鄂斯滿授庫車漠咱爾巴授和闐噶達墨特授阿克蘇阿布都拉授烏什阿均封三品奇木伯克錫之土地是爲六城大伯克焉六城大伯克每年輪值一人領班各城有六品以上之伯克一員二員隨領班之大伯克入覲烏什者本雲集斯所居回疆旣平以其子漠咱爾巴爲和闐伯克霍集斯召入京阿布都拉哈密回子也以功封于烏什與駐防大臣蘇成貪酷兇淫致有三十年烏什之變事平復移駐喀什噶爾參贊于烏什所有附近葱嶺山場遊

牧咸屬布魯特回子亦以其比也即汗効力行間有功以塔什伯里克城賜之爲喀

什噶爾九城之一 凡山場回子皆其管轄是屬回回別種

準噶爾事略

準噶爾本蒙古苗裔準謂東噶爾謂手準人又謂南爲東蓋蒙古迤南部落也其始爲脫歡什蒙古稱釜爲脫歡獨準人避之改稱釜爲海蘇脫歡傳至孛汁世有部落至巴圖魯渾臺吉者自孛汁以來又十四傳矣巴圖魯渾臺吉子十人長策臣次巴圖爾五僧格六噶勒丹博碩克圖僧策臣巴圖爾所殺噶勒丹博碩克圖初居西域後歸嗣爲汗康熙年屢侵喀爾喀部 聖祖仁皇帝親統六師一出拖諾山敗之于昭摩多譯音松樹塘 一出狼居胥山獲其塞卜騰班碩爾以歸噶勒丹博碩克圖抑藥死諸部乃定僧格有子二索諾本阿勒布坦先爲噶勒丹博碩克圖所殺策妄阿勒布坦率僧格舊臣七人以逃至是始歸自西藏復成部落反俗爲汗當時曾受梵封爲額爾得尼卓里克圖洪臺吉譯言寶

權大慶王達喇嘛賜鐵印衛拉特部分之謂舊音訛爲瓦刺蓋其族有四曰都爾伯特曰綽羅斯曰土爾扈特曰和碩特分統嶺北全部各有首領以雄據之而綽羅斯尤爲之長其輝特部本附庸于都爾伯特嗣土爾扈特與策妄阿勒布坦構釁率所部投俄羅斯乃復以輝特部實之仍稱四衛拉特四衛之大臺吉亦稱汗王小臺吉皆汗王之宗爲之二十四鄂托克爲準噶爾汗之部屬二十一昂吉爲各臺吉之戶屬而統屬於其汗鄂托克游牧之所環於伊犁昂吉游牧之所又環諸鄂托克之外集賽者專理喇嘛事務舊曰五集賽後增其四爲九集賽鄂托克領以宰桑各有游牧分地而集賽亦各有宰桑如鄂托克焉官屬自圖什墨爾以下凡十等準噶爾專尙黃教凡決疑定計必咨于喇嘛而後行人得其一撫摩一接手者爲大福伊犁河濱有佛寺二皆策妄阿勒布坦建河之北曰固爾札廟河之南曰海努克廟聚集喇嘛居之合五鄂托克輪值供養喇嘛中之坐床者名西勒圖即掌教都綱也禮佛之儀衆喇嘛褊袒脫

禪露肩以爲致敬人皆不事田作惟以畜牧爲業食其肉飲其酪衣其皮無一不取給于牲畜欲粒食則因糧於回部回部苦其抄掠歲納常賦因是不惟賦稅之且役屬之喜射獵放鷓鴣其居處雖冬夏遷徙而各有分地每歲分四節禮佛誦經不殺生最重者年元旦卑幼見尊長叩首抱膝掐眉以爲禮四月造乳酒以祭天積年置閏亦同中國凡政事決於圖什墨爾圖什墨爾上之臺吉施行刑法輕則鞭腰重則割手足耳鼻以示懲然後斬首盜馬盜羊者償以妻子無妻子則給本身與事主爲奴有行軍失伍及逃回者游行狗衆後盛以革囊以錐錐之鮮不死者人歿則延喇嘛檢露珠海書有應用五行葬法者以法葬之不則撤蒙古包棄尸于道旁每遇草青思其祖父亦一酬奠焉雍正年策妄阿勒布坦卒子噶勒丹策凌嗣噶勒丹策凌卒子策妄多爾濟那木札爾嗣尋爲其庶兄喇嘛達爾札殺之喇噶達爾札自立後阿睦爾撒納與班珠爾欲誘立噶勒丹策凌幼子策旺達什爲汗爲喇嘛達爾札所害達瓦齊亦以喇

嘛達爾札之害其近屬達什達瓦也恐禍及遂偕阿睦爾撒約同逃哈薩克未幾阿睦爾撒納潛回伊犁殺喇嘛達爾札於帳中立達瓦齊爲汗達瓦齊者渾臺吉之孫布木之子於策妄多爾濟爲再從姪達瓦齊始與阿睦爾撒納同謀篡立繼而聽衆宰桑言與之生隙阿睦爾撒納遂據額敏河及額爾齊斯諸游牧處爲自固計達瓦齊以兵蹙之時準噶爾篡奪相仍諸部瓦解乾隆十八年十九年四衛拉特先後款關投誠求脫水火朝命將軍班第率師討之二十年二月將軍進至準噶爾二十四鄂托克二十一昂吉等爭先迎降達瓦齊以兵萬餘衆西走保格登鄂拉阿玉奇錫率健士二十五人追及夜突其營出賊不意衆大潰自相蹂躪擒獲甚多黎明悉收撫之達瓦齊僅以身免五月大兵抵伊犁回部伯克霍集斯擒達瓦齊以獻伊犁平先是都爾伯特部臺吉策凌等首先內附爲聞風歸來者倡乃移其部於阿勒坦鄂拉

即古金山鐵勒回紇皆以此爲望鎮阿勒坦蒙古稱金之

謂繼之綽羅斯部噶爾藏多爾濟和碩特部臺吉班珠爾輝特部阿睦爾撒納

先後來降咸封汗號並授扎薩克銜俾安游牧又和碩特部之沙克都爾曼濟爲盟長居其部於巴爾庫勒而綽羅斯之薩拉爾輝特之巴雅爾皆封爵有差時阿睦爾撒納覬覦爲總臺吉 高宗純皇帝察其狡猾不許阿睦爾撒納遂煽惑其黨爲亂而巴雅爾噶爾藏呢瑪等漸附爲逆惟都爾伯特守臣節不從於是四載天戈犁庭掃穴一苞三葉盡就芟夷讀平定準噶爾紀略則四衛拉特失國之由實以無人致敗大哉王言昭鑒千古矣

準噶爾舊疆考附

烏孫居天山北與匈奴接壤南臨城郭諸國即舊準噶爾部也至元魏時爲高車隋爲缺勒唐爲回鶻回鶻自唐末散處山南即今回部也至蠕蠕突厥並屬胡種與高車缺勒回鶻異族魏書稱烏孫在龜茲西北是烏孫於元魏時已西遷龜茲以東爲匈奴餘部高車所據蠕蠕主社淪亡依高車旋破其部復西侵烏孫拓地至龜茲西北此蠕蠕盛時與今準噶爾全境相倣

突厥世臣蠕蠕至元魏末木杆可汗又擊蠕蠕滅之後分東西突厥割據烏孫故地是準噶爾全境盡爲西突厥地東境則猶屬東突厥也天寶初東突厥地入回紇五代及宋聲教弗及元代西北最廣應屬諸王行營統軍之地明時衛拉特當韃靼西巴什伯里北南與于闐相直與今準部方位悉合伊犁舊屬準噶爾庭爲疏其全境沿革大略系此以備考又按赤谷在今伊犁西路烏孫東境與匈奴接魏書稱烏孫在焉耆西北是其東境已削悅般即烏孫國又稱在龜茲國北則悅般之在伊犁較然突厥射匱可汗徙庭三彌山即今汗騰格里鄂拉南去庫車三百餘里北二百里即伊犁與魏書北去突厥牙帳六百餘里之說合則伊犁又爲射匱可汗庭入唐爲嗚鹿都督府蓋突厥未滅蠕蠕之前伊犁爲悅般國地後其國爲蠕蠕所滅是以并滅烏孫拓地至龜茲西北而蠕蠕尋爲突厥所滅射匱乃建庭於此唐之突厥南庭應在伊犁東境所謂由焉耆西北七日行今伊犁東南之空格斯東南

之哈喇沙爾六百里山朝水束爲伊犁形勝之冠正當其地賀魯盜北庭又
建牙于伊犁麗永蘇定方逐賀魯至雙河二百餘里抵其牙賀魯西跳伊麗
水今伊犁東北二百里博羅塔拉爲伊犁東境門戶地有鄂托克賽里庫色
木蘇克河水會合故稱雙河唐之雙河都督即其地也又唐書回鶻傳契苾
在焉耆西北鷹沙川多覽葛之南貞觀六年來歸以其地爲榆溪州裕勒都
斯即鷹沙川今自空格斯迤東南輸山而止適當哈喇沙爾西北境唐以之
爲鷹沙都督府而契苾故地當其南境鐵勒傳稱鐵勒自西海之東依據山
谷伊吾以西焉耆之北傍白山則有契弊薄落職乙啞蘇婆那紇骨也啞於
尼謹等按鐵勒在天山一帶山谷之間此隋書所云在伊吾西焉耆北者契
弊疑隨時正居焉耆之北至唐稍西遷近鷹沙川唐以其地爲榆溪州者專
指契弊而言以今焉耆北境登努勒臺求之方位更不爽也苾弊音同而字
異